

53

山西通志卷第一百二十一

山西巡撫都察院右副都御史臣覺羅石麟奉

首修輯

人物二十一

寧武府

隋

梁睿字恃德禦子少沉敏有行檢周文時以功臣子養宮命中正開府改封五龍郡公渭州刺史閔帝受禪徵爲御伯出爲中州刺史鎮新安齊人來寇睿輒挫之拜大將軍以預佐命功進爵蔣國公入爲司會後從齊王憲拒齊將斛律明月於洛陽每戰有功遷小冢宰歷敷州刺史涼安二

登記號65046  
36年12月20日

913.514  
776  
53

州總管俱有惠政進位柱國隋文總百揆代王謙爲益州  
總管行至漢川西謙反睿不得進命睿爲行軍元帥討之  
進至龍門謙將趙儼奉會擁衆十萬據嶮爲營睿令將士  
銜枚出間道四面奮擊力戰破之鼓行而進轉戰連捷逼  
成都謙親帥精兵五萬背城結陣睿擊敗之城降謙將三  
十騎遁走執斬於市劚南悉平進位上柱國總管如故威  
振西州夷獠歸附奏請略定南寧文帝以天下始定人心  
不安初未之許後竟遣史萬歲討平之因睿之策也及受  
禪顧待彌隆見突厥方強恐爲邊患陳鎮守策十餘事帝  
嘉歎之睿以周代舊臣久居重鎮屢請入朝徵還恩眷逾  
厚尋謝病闔門自守不交當時賜以板輿每有朝覲必令  
三衛輿上殿十五年從至洛陽而卒謚襄子洋嗣歷嵩陰

二州刺史武賁郎將大業六年詔改睿封爲戴公以洋襲  
侯莫陳崇字尙樂代武川人祖元以良家子鎮代武川因家  
焉父興殿中將軍羽林監贈柱國太保清河郡公崇少驍  
勇善騎射謹慤少言年十五隨賀拔岳與爾朱榮征葛榮  
後從岳入關破赤水蜀又從岳力戰破万俟醜奴崇與輕  
騎逐北至涇州長坑及之賊未成列崇單騎入賊中於馬  
上生擒醜奴遂大破之封臨涇縣侯及岳爲侯莫陳悅所  
害崇謀迎周文帝時原州刺史史歸爲悅守周文遣崇襲  
歸直到城下卽據城門城內鼓譟伏兵悉起遂擒歸斬之  
以崇行原州事仍從平悅別封廣武縣伯累遷儀同三司  
改封彭城郡公從擒竇泰復弘農破沙苑戰河橋又別討  
平稽胡累戰皆有功進柱國大將軍拜大司空周初進封

梁國公加太保歷大宗伯大司徒保定三年從武帝幸原州時帝夜還崇私議宇文護護遣使將兵就崇宅逼令自殺謚躁護誅改謚莊閔子芮嗣位柱國從東伐守太行道并州平授上柱國仍從平鄴拜大司馬隋大業初流嶺南侯莫陳順代武川人少豪俠有氣度初爲爾朱榮統軍普泰元年封本縣子從孝武入關順與周文帝同里閈弟崇又先在關中進彭城郡公梁仏定逼河州爲大都督討破之尋行河州事大統四年魏文帝東討順留鎮長安時趙青雀反王盟周惠達奉魏太子出次渭北順於渭橋與賊戰頻破之魏文帝還執順手曰渭橋之戰卿有殊功解所服金鏤玉梁帶賜之南岐州氏羌符安壽遂率部落一千欵附改封河間郡公六年加驃騎大將軍開府儀同三司行

西夏州事改平原郡公周初拜少師進柱國卒崇弟瓊荆  
州總管上柱國封修武郡公瓊弟愷以軍功賜爵下蔡縣  
男崇靈武縣侯周初轉授爲開府儀同三司進公天和中  
爲司會中大夫建德二年爲聘齊使

侯莫陳穎字遵道代人崇子也少有器量風神警發爲時輩  
所推魏大統末以父功賜爵廣平侯累遷開府儀同三司  
從滕王迺擊龍泉文城胡懸軍五百餘里破其三柵時詔  
胡厭匿良人者誅沒其妻子有人言爲胡村所隱匿柱國  
豆盧勣將誅之穎曰未若召其渠帥以隱匿者付之令自  
歸首勣從之諸胡爭降附遷司武加振威中大夫隋初加  
上開府進昇平郡公伐陳以行軍總管從秦王俊出魯山  
道渡江安集歸附再遷瀛州刺史甚有惠政後免百姓送

者莫不流涕因立碑頌穎清德後拜邢州刺史仁壽中吏部尚書牛弘持節巡撫山東以穎爲第一上優詔褒揚時妙簡清吏蒞嶺南徵入朝進大將軍拜桂州總管十七州諸軍事大崇恩信人夷悅服煬帝初以兄芮事徵還後拜恒山太守時嶺南閩越多不附帝以穎爲南方所信服拜南海太守卒官謚曰定子虔會知名

王德字天恩代武川人少善騎射以孝弟稱初從平元顯賜爵同官縣子又從平万俟醜奴別封深澤縣男與寇洛等翊戴周文除平涼郡守德雖不知書至於斷決處分良無以過涇州所部五郡德常爲最孝武西遷進下博縣伯行東雍州事在州未幾百姓懷之賜姓烏丸氏大統元年進爵公加車騎大將軍遷儀同三司北雍州刺史後累有戰

功加開府侍中進河間郡公拜河州刺史羣羌率服後卒  
於涇州刺史謚曰獻德性厚重廉慎言行無擇母幾年百  
歲後德終子慶嗣性謹厚位開府儀同三司初德喪父貧  
無以葬賣子公奴并一女以營葬事旋遭兵亂及在平涼  
始得之遂名曰慶

韓果字阿六拔代武川人少驍雄善騎射賀拔岳引爲帳內  
後從平侯莫陳悅大統初累進爵石城公果性強記兼有  
權略善伺敵虛實揣知情狀有潛匿溪谷欲爲間諜者果  
登高望之所疑處往必有獲由是爲虞候都督常領候騎  
晝夜巡察略不眠寢從平寶泰賞真珠金帶一條又從復  
弘農破沙苑戰河橋並有功歷朔安二州刺史從戰芒山  
除河東郡守又從破稽胡於北山進兵窮討散其種落稽

胡憚果勁捷號爲百翅人周文聞之笑曰著翅之名寧減  
飛將累遷開府儀同三司進褒中郡公保定三年拜少師  
進柱國天和初授華州刺史爲政寬簡吏人稱之卒子明  
嗣爲黎州刺史與尉遲迥同謀被害

庫狄昌字持德神武人少便弓馬有膂力每以將帥自許從  
爾朱天光定關中又從賀拔岳征討岳被害翊戴周文從  
平侯莫陳悅賜爵陰盤縣子後從迎孝武復潼關改封長  
子縣子大統初累遷開府儀同三司進方城郡公授稍伯  
中大夫周初拜大將軍卒

王勇代武川人本名胡仁少雄健有膽決數從侯莫陳悅賀  
拔岳征討功居多拜別將周文爲丞相封包信縣子從擒  
竇泰復弘農戰沙苑氣蓋衆軍所當必破周文歎其勇敢

賞賜特隆進爵公周軍不利唯胡仁及王文達耿令貴三  
人力戰軍還皆拜上州刺史令探籌取之胡仁遂得雍州  
賜名勇進侍中驃騎大將軍開府儀同三司恭帝元年從  
征蠕蠕破之進新陽郡公賜姓庫汗氏又別封永固縣伯  
特請廻授兄子興時人義之尋進大將軍卒子昌嗣官至  
大將軍

李虎隴西成紀人涼武昭王嵩之元孫祖熙爲金門鎮將戍  
於武川因留家焉虎西魏時賜姓大野氏官至太尉與李  
弼等八人佐周伐魏有功皆爲柱國號八柱國家孝閔受  
禪虎已卒追錄其功封唐國公諡襄子昞襲隋柱國大將  
軍卒謚仁昞生淵於長安卽唐高祖也

獨孤信雲中人本名如願祖俟尼和平中以良家子鎮武川

因家焉父庫者領人酋長少雄豪有節義北州咸敬服之信美容儀善騎射正光末與賀拔度等同斬衛可瓌由是知名後爲葛榮所獲信少年自修飾服章軍中號獨孤郎及爾朱氏破葛榮以信爲別將從征韓婁匹馬挑戰擒賊漁陽王表賜周後破元顥黨賜爵受德縣侯遷武衛將軍賀拔勝表爲大都督新野郡守與浙陽守韋孝寬政術俱美號爲連璧勝令入闕撫賀拔岳餘衆魏孝武雅相委任孝武西遷信單騎及於瀍澗孝武歎曰武衛遂能辭父母捐妻子從我世亂識忠臣豈虛言哉進浮陽郡公爲衛大將軍都督三荊州諸軍事兼尚書右僕射東南道行臺大都督荊州刺史東魏刺史辛纂出戰信縱兵擊大敗之都督楊忠等前驅斬纂三荆遂定東魏又遣高敖曹侯景奄

至信率麾下奔梁後許還北時信父母在山東梁武帝問所往答以事君無二梁武義之大統三年至長安轉驃騎大將軍加侍中開府尋拜領軍將軍從復弘農破沙苑改河內郡公聞父卒發喪行服尋起爲大都督入洛陽穎豫襄廣陳留金欵附四年東魏將侯景圍洛陽信據金墉城隨方拒守旬有餘日及周文帝至瀍東景退走信爲右軍戰不利六年侯景寇荊州令信出武關景退爲大使慰撫三荆尋除隴右十一州大都督秦州刺史事無壅滯示以禮教勸以耕桑數年中公私富實流人願附者數萬家周文以其信著遐邇賜名信七年岷州梁公定舉兵反詔討之公定爲部下所殺而子弟仍拒守信勒兵向萬年頓三交谷口詭道趨稠<sub>江</sub>嶺賊不虞信兵之至望風奔潰乘勝

逐北徑至城下賊僉出降加太子太保芒山戰不利信帥  
散卒自後擊之齊追騎驚擾諸軍因此得全涼州刺史宇  
文仲和不受代率開府怡峰討之夜令諸將以衝梯攻其  
東北信親率壯士襲其西南達明克之擒仲和拜大司馬  
十三年移鎮河陽十四年進柱國大將軍錄前後功子善  
封魏寧縣公穆必要縣侯藏義寧縣侯邑各一千戶順武  
成縣侯陁建忠縣伯邑各五百戶又聞母卒追贈庫者司  
空公母費連氏常山郡君十六年遷尚書令拜大司馬周  
初遷大宗伯進衛國公邑萬戶趙貴死晉公護逼令自盡  
年五十五信美風度雅有奇謀大略周文以隴右形勝故  
委信鎮之旣爲百姓所懷聲震鄰國侯景奔梁東魏魏收  
檄梁文矯稱信據隴右不從宇文氏乃云無關西之憂欲

以謫梁人也信在秦州獵日暮馳馬入城帽微側詰旦吏人戴帽者咸慕信而側帽焉其爲隣境及士庶所重如此信長女周明帝敬后第四女唐元貞皇后第七女隋高祖文獻后三代皆爲外戚自古以來未之有也隋初贈太師上柱國十州諸軍事冀州刺史封趙國公邑萬戶謚曰景庫者使持節太尉上柱國六州諸軍事定州刺史封趙國公邑萬戶謚恭母費連氏太尉趙恭公夫人

王盟字仵明德皇后之兄其先樂浪人六世祖波前燕太宰祖环魏黃門侍郎贈并州刺史樂浪公父羆伏波將軍以良家子鎮武川因家焉正光中破六韓拔陵攻陷諸鎮爲所擁後流寓中山以積射將軍從蕭寶夤西征隨賀拔岳禽万俟醜奴平秦隴常先登力戰周文平侯莫陳悅除原

州刺史孝武至長安封魏昌縣公大統三年徵拜司空轉  
司徒迎文帝悼后於濡蠕加侍中遷太尉東征以留後大  
都督行雍州事節度關中諸軍趙青霍之亂輔太子出頓  
渭北事平進長樂郡公賜姓拓跋氏遷太保九年進位太  
傅加開府儀同三司盟姿度弘雅仁而汎愛雖居師傅而  
謙恭自處未嘗以勢位驕人及疾上數幸其第親問所欲  
十一年薨贈本官謚曰孝定

王勒字醜興盟子忠果有材幹年十七從周文入關平秦隴  
定關中周文嘗謂曰爲將坐見成敗者上也披堅執銳者  
次也勒曰意欲兼之周文大笑拜散騎常侍賜爵梁甫縣  
公大統初爲千牛備身直長領左右出入臥內小心謹厚  
魏文帝嘗曰王勒可謂不二心臣也沙苑之役勒以都督

領禁兵居左翼被傷重卒於行間周文深悼贈使持節太  
尉尚書令十州諸軍事雍州刺史追封咸陽郡公謚曰忠  
武子弼襲爵尚魏安樂公主位大都督通直散騎常侍勒  
弟懋字小興盟之西征也懋幼留山東永安中始入關遂  
從征伐大統初賜爵安平縣子進爵爲公遷右衛將軍盟  
卒懋上表辭位乞終喪制魏文不許累遷開府儀同三司  
侍中左衛將軍領軍將軍溫和敬慎宿衛十餘年未嘗有  
過廢帝二年除南岐州刺史賜爵安寧郡公拜小司寇卒  
官子悅嗣位大將軍同州刺史改封濟南郡公

王顯盟兄子幼敏悟沉靜少言爲周文帳內都督累遷驃騎  
大將軍開府儀同三司光祿卿鳳州刺史賜爵洛邑縣公  
進位大將軍卒子誼字宜君少有大志便弓馬博覽羣言

閔帝時爲左中侍上士晉公護執政帝拱默無所關預有朝於帝者微不恭誼勁然進擊之朝臣無敢不肅遷御正大夫父艱毀瘁過禮廬於墓側負土成墳武帝卽位遷內史大夫封楊國公齊平自相州刺史徵爲大內史汾州稽胡亂帝弟越王盛譙王儉爲總管竝受誼節度擊平之封一子開國公受遺詔輔政宣帝卽位憚誼剛正出爲襄州總管隋文爲丞相時鄖洛多難誼分兵討之旬月皆平遣使勞問冠蓋不絕以第五女妻其子奉孝拜大司徒誼自以與帝有舊亦歸心焉隋受禪顧遇彌厚奉使突厥稱旨進郢國公子奉孝卒踰年誼表請公主除服爲御史大夫楊素所劾詔不問然恩禮稍薄有告誼謀反者帝令案其事無實賜酒釋之尋以罪賜死